

## **Mirsad Hadžikadić:**

Padala je kiša. Mirzeta, ja i naše komšije otišli smo tamo zajedno taksijem, i stigli smo oko 15:15, a skupština je trebala početi u 16:00. Vidjeli smo dugi red, a kiša je padala, i ja sam pomislio da je to odlično, s obzirom na to da Bosanci nisu baš poznati po mirnom čekanju u redu, bez pokušaja da se proguraju naprijed. Mnogi su to kasnije komentarisali, govoreći da je to zapanjujuće i da su ljudi koji su došli na taj događaj drugačija vrsta ljudi, da su to civilizovani ljudi. Dok smo ulazili, vidjeli smo zaštitare i ljudi su polako ulazili i mnogi su bili za stolom za registraciju. Ja sam rekao da je to odlično i da imamo šansu imati pristojan broj ljudi. Kad sam to rekao, organizator događaja se okrenuo prema meni i pitao me o čemu govorim. Rekao sam da ćemo uz sve te ljude možda napuniti salu, na šta su mi odgovorili da je sala već puna. Začudo sam pitao zar su sva mjesta zauzeta, i šta da radimo sa ljudima koji su još uvijek vani jer tek je 15:15, na šta su mi odgovorili da će oni morati stajati. Na kraju je bilo zapanjujuće. Očekivali smo i nadali se da će doći 800 ljudi i da će napuniti salu, što je kompletan kapacitet za sjedenje, a stiglo je 1200 a vjerovatno i više, tako da je 300-400 ljudi moralo stajati. Neke VIP osobe su stigle i njihova sjedišta su bila već zauzeta i ljudi ta mjesta nisu dali. Bili su ambasadori i predsjednici drugih stranaka koji su došli i morali su stajati. Ja tad nisam to znao. Cijeli događaj je bio... pa rekao bih da je 99,9% ljudi reklo da je bio sjajan i nadahnjujući. Bilo je puno energije, ljudi su pjevali. Trajalo je oko sat i 50 minuta. Rekli su da je bilo opušteno i vrlo neobično u odnosu na ono što su navikli sa raznim drugim strankama. Rekao bih da je ogromna većina izuzetno zadovoljna kako je događaj protekao. Svidjeli su im se govori. Dakle, bilo je nadahnjujuće i zaista divan početak ovog Pokreta. Naši ljudi su bili puni energije a pojavilo se i mnogo novih ljudi.

Sljedeći dan imao sam prijenos uživo na Facebooku i bilo je nekih pitanja u vezi ovog događaja. Bilo je očito da je jako dobro o tome izviješćeno u medijima. Dobio sam mnogo poziva na razgovore sa medijima, TV kućama, i na kraju je bilo zaista vrlo interesantno. Ja sam znao kako je sve trebalo da bude pa sam znao i koji koraci su propušteni, ali ljudi to nisu znali. Naredni put će očito biti stvari koje ćemo poboljšati, ali sve u svemu, s obzirom na interes i pažnju medija koju smo dobili, momentum koji je pokrenut, bila je to sjajna stvar. Sada smo u fazi kad razmišljamo o sljedećem koraku. Večeras ćemo putem Skypea imati prvu sjednicu upravnog

odbora, a zatim ćemo osnovati lokalne organizacije na terenu, u raznim regijama. Moramo da pronađemo ljude pa smo počeli putovati. Tokom posljednja dva dana, U Zenici sam održao predavanje na novom studiju koji su osnovali - studiju softverskog inženjstva. Juče je u Tuzli održana ceremonija povodom inženjerske sedmice, i mene su zamolili da održim predavanje o naprednim tehnologijama, što sam i učinio. U oba slučaja sam se obratio ljudima iz industrije. Ljudi nas sada traže. Danas sam razgovarao sa ambasadorom Švedske, a za desetak dana ću razgovarati sa američkim ambasadorom, kao i norverškim ambasadorom. Ostale stranke nas zovu kako bismo razmotrili kako da sarađujemo. Zamah je veliki, ali sada moramo da sazrijemo kao organizacija i da uspostavimo procese i procedure, pronađemo ljude koji imaju integritet i sposobnost i koji nisu u ovome zbog sebe nego zbog države. To će biti sljedeći veliki korak jer, iskreno, lokalni izbori su za samo 18 mjeseci i ja mislim da ljudi već odustaju od ideje da će trenutna vlada na osnovu opštih izbora biti formirana, a pripreme za lokalne izbore su već u toku. Mnogo je uzbuđenja, mnogo mogućnosti, mnogo logističkih koraka koji se moraju poduzeti. Moramo pronaći lidere i postaviti ih na funkcije. Izazovno je i uzbudljivo. Juče je bilo prelijepo. Bili smo na tom događaju povodom inženjerske sedmice, i nakon što sam završio sa svojim govorom, mnogo mladih ljudi mi je prišlo i željelo se fotografisati sa mnom i zahvaliti mi se. Rekli su da im se jako svidio govor. Jedan od njih me se naročito dojmio jer mi je prišao i zahvalio ne samo što sam im dao nadu i zato što sam imao hrabrost da dođem ovdje, nego i zato što sam promijenio njegov život, jer jesam to učinio – promijenio način njegovog razmišljanja o životu. To je bilo sjajno. Nakon toga smo ručali sa jednim poslovnim čovjekom koji je vlasnik jedne kompanije, i koji je rekao da ne zna šta se dogodilo, ali nešto se dogodilo s njim jer je shvatio svoju odgovornost prema državi, i da on sad razgovara sa svima, sa svim svojim prijateljima o našoj poruci, a to je da preuzmu odgovornost. Dakle on sad ide okolo i razgovara s ljudima, i onima koji ga pitaju o čemu uopšte govori i da se previše uzбудio u vezi ovoga jer sve je to isto kaže da danas ili večeras odu svojoj kući i da se pogledaju u ogledalo, i da se zapitaju jesu li učinili išta što su mogli za ovu državu i ovu zajednicu. I onda je rekao da mu je jedan čovjek koji se najviše protivio bilo kakvom spominjanju mog imena ili potencijalnog pridruživanja nama sljedećeg dana rekao da nije spavao cijelu noć jer mu je to pitanje zapelo u glavi cijelu noć, i da mu priznaje da je u pravu. Da nije sve učinio. I to je zapanjujuće. Jedan

čovjek iz Zenice me zamolio da uključim što više mladih, ali da ih pripremim, da osnujem akademiju za mlade ljude kako bi se politički aktivirali, tako da poznaju relevantne teme, ustavno pravo i uređenje, tako da znaju koje su odgovornosti i dužnosti kandidata za razne pozicije za koje bi se mogli kandidovati jednog dana. I on je obećao financirati tu aktivnost. To je sjajno. Nismo to imali prije. Sad ljudi koje smo sreli prije i koji su stajali sa strane dolaze u prvi plan i u centar, pitajući kako mogu pomoći i doprinijeti. Dakle, to je to, oprostite, puno pričam, ali to se sve izdešavalo.

**Clark Curtis:**

Ovo su sjajne teme za razgovor i možeš pričati koliko god želiš. Kad smo ja i ti ukratko razmijenili poruke nakon skupštine, upotrijebio si riječ „čarobno“. Možeš li nam malo više reći o tome?

**Mirsad Hadžikadić:**

Bilo je čarobno u smislu da je prije svega mjesto održavanja bilo jako reprezentativno, sa interesantnim kružnim rasporedom. Onda se pojavite i sve je već puno, a sve to vrijeme ste brinuli hoće li biti dovoljno ljudi da popune sjedišta i kako time upravljati. Ali onda vidite da je sve već puno i već tad je bilo očito da će biti i ljudi koji će morati stajati. Dok sam prilazio do prednjeg dijela sale, ljudi su počeli pljeskati, što znači da su već bili dobro raspoloženi. Ljudi su me pozdravljali i čestitali, a svi su se smješkali, čime je sve bilo na pravom mjestu. Bio je *high-tech* dojam svega toga jer smo uspjeli i da se ljudi iz dijaspora loguju, prisustvuju skupštini i glasaju. Dva-tri velika ekrana su postavljena, zvuk je bio fantastičan, a kvalitet zvuka mi je jako važan. Zatim smo započeli sa državnom himnom, a nakon toga je izašao čovjek koji je otpjevao himnu pokreta, i na pola pjesme on je pozvao publiku da mu se pridruže u pjevanju, što su mnogi i učinili. Imali su spreman tekst pjesme. Time je postavljena scena, a zatim je voditeljica ceremonije održala jako lijep uvodni govor koji je bio jako inkluzivan, što je također doprinijelo lijepom raspoloženju. Na kraju događaja sam ja održao govor od nekih 20-25 minuta. U tom smislu je bilo skoro kao slavlje više nego kao konvencija, a ona sretna lica ljudi kojima nije smetalo ni da stoje tako dugo i koji su došli tu da vide i pronađu nadu, da budu nadahnuti - sve se

to dogodilo. Bilo je zaista čarobno. Nekoliko puta sam morao da se borim sa navalom suza, dok su ljudi pričali o tome što se događalo i svi oni su govorili o nadi po prvi put i o potencijalu za promjene. Dakle, da, to sam mislio pod tim kad sam rekao „čarobno“.

### **Clark Curtis:**

Kad je u pitanju velika slika i značaj ovoga što se dogodilo, predviđali smo šta bi se moglo dogoditi, ali sad znaš šta se dogodilo na tom događaju: značaj svega toga.

### **Mirsad Hadžikadić:**

Da, i zapravo iznenada vjerujete, a ja vjerujem iskreno i u potpunosti da je to o čemu govorimo relevantno i zapravo najznačajnije za dugoročni uspjeh ove države. Međutim, zadovoljstvo je vidjeti sve više i više ljudi koji vjeruju u istu stvar i koji to govore; kad vidite ljude koji stoje samo da bi bili dio toga; kad razgovarate kao što sam ja danas sa ambasadorom koji nas prepoznaje i priča o Pokretu kao o potencijalu za promjene. To nije nagrada, ali jeste ohrabrujuće da smo na pravom putu i da se nešto zaista značajno može i hoće desiti ako obavimo svoj dio posla kao što i namjeravamo uraditi. Jedini problem koji jako dobro razumijemo u svemu ovome je da će ključ svega biti pronaći prave ljude koji će proširiti dobre vijesti širom zemlje, koji će organizovati lokalne odbore i njihove operacije, koji će biti na glasačkim listićima za dvije godine na lokalnim izborima i za četiri godine na opštim izborima. Bit će zaista teško pronaći ljude koji ispunjavaju sva tri kriterija: da im je Bosna na prvom mjestu kad su u pitanju njihovi ciljevi i šta maksimizirati; sposobne ljude koji posjeduju vještine u određenim aspektima političkog, društvenog i ekonomskog života; ljude sa integritetom koji nisu učestvovali u korumpiranom političkom sistemu - možda su učestvovali i pokušali da ga poboljšaju, ali radnjama koje su dokazale da oni zaslužuju povjerenje. To će biti ispit koji ćemo zaista morati da položimo sa najboljom ocjenom, inače će se ljudi razočarati i reći da nema svrhe jer smo isti kao i svi ostali. Dakle, ovo je krucijalni period za nas i mislim da je jako uzbudljivo ali i zabrinjavajuće, sa velikim mogućnostima i sa velikom odgovornošću. Međutim, mi smo spremni i mi rastemo svakim danom.

**Clark Curtis:**

Rekao sam ti ovo ranije ali reći ću ti ponovo koliko sam ponosan na tebe i na sve što ste pokrenuli, i ako ne možeš ili ne želiš reći u redu je. Vidjevši sve što si postigao od maja, znam da je to dug put i mnogo je stvari koje se moraju uraditi, ali imaš li nekih ličnih razmišljanja o tome čega si dio i što si u suštini kreirao?

**Mirsad Hadžikadić:**

Pa, krenuo sam sa zamišlju da je to stvarno moja dužnost i moja odgovornost. Ne vjerujem da stvarno treba da preispitam sve što se dogodilo i budem ili ne budem ponosan na bilo šta što smo postigli. Cilj je učiniti ovu državu boljim mjestom i ja ću učiniti sve što mogu da uspijemo. Bilo da ova država na kraju stvarno postane puno bolja ili ne, a ja ću učiniti sve što ja mogu da ju učinim boljim mjestom, znam da neću biti razočaran ili dovoditi išta u pitanje kad je riječ o mojim odlukama, niti ću biti ponosan, jer zaista je osjećaj dužnosti da učinim sve što mogu. Dakle, neću odmarati niti ću se umoriti dok se taj cilj ne ispuni, mada taj cilj nikad ne može biti ispunjen jer bez obzira kako bude, uvijek može biti bolje. Dakle, uopšte to ne gledam iz te perspektive da je to ikakav osjećaj ponosa, dostignuća ili lične satisfakcije. To je samo osjećaj da je putovanje započelo, i moraju se posmatrati dvije stvari: opšti cilj i sutrašnjica, i o tome ja razmišljam sve vrijeme. Čak i na samom kraju odnosno zaključku osnivačke skupštine, ja sam razmišljao o ljudima koji su odlazili. Je li im se svidjelo, šta su mislili? Znam da su mnogi od njih rekli da je bilo sjajno i odlično, i da je skupština dobro organizovana, ali nikad se ne zna da li to ljudi kažu samo zato da budu ljubazni. To mi je uvijek na umu: jesmo li postigli cilj? Dakle, zaista ništa lično nema u tome.

**Clark Curtis:**

Ja ću ipak biti ponosan na tebe.

**Mirsad Hadžikadić:**

Hvala što to kažeš.

**Clark Curtis:**

Ne mogu ti opisati kakve emocije ovo budi u meni. Bio sam tamo s tobom, ali volio bih da sam bio prisutan fizički. Mislim, gledao sam skupštinu, ali biti prisutan tu fizički je nešto sasvim drugo, i ne mogu ti opisati kako na mene utiče kad vidim šta se dešava.

**Mirsad Hadžikadić:**

Hvala ti, to mi puno znači, i moram ti reći da je to bio veliki događaj, i mislim, odnosno nadam se da će se vremenom na ovo gledati kao na historijski događaj. Dao je dojam takvog događaja, ali vrijeme će pokazati da li je stvarno bio, ali znam da ćemo ja i ljudi oko mene uraditi apsolutno sve da se pobrinemo da se te promjene zaista dogode.